

六藝之一錄

七三



欽定四庫全書

六藝之一錄卷一百六十五

錢唐倪濤撰

法帖論述三十五

孫退翁庚子銷夏記

五月之末久旱不雨林居始覺有藝意靜坐青藤
下取古石刻繙閱日以二卷為率憶丁亥之冬曾
著帖考今再再十三年矣舊所見者失去大半存
者重一寓目聊借以瀟洒送日月而已烟雲過眼

寧敢謬執為常有乎退翁手記

宋賜畢文簡淳化閣帖

淳化帖為墨苑至寶內府棗木板搨用澄心堂紙李
廷珪墨者絕少其字極豐穰而有神采凡鈎捺轉折
起伏諸法俱備宛如手書余初見一二本上有翰林
學士院印及紹聖三年裝題字者極精工寶之如拱
璧忽於戊子之春見九本乃淳化四年賜學士畢士
安者搨法佳妙紙色墨色如古漆板誠海內第一部

也時賈人索價甚昂余與子朴極力搜措衣物一時俱罄蓋恐市賈圖利分晰售之使此奇寶無復珠聯璧合之日非為一人耽清玩也

帖中第八卷第十卷俱有畢文肅題云淳化四年四月二十八日當直中使就院賜御札八分千字文一卷法帖一十卷受恩如是激節可知第九卷有蘇丞相頌題云蘇氏家藏子容題第十卷題云乙卯閏六月十四日太一宮齋晚臨南軒看不知誰題下有長

字印疑是賈秋壑又有李洪德秀題云右法帖十卷
得於吳興蘇氏乃元祐丞相魏公家物第八卷後用
公高之喬印蓋言畢公高之後也余假守濡須郡刊
魏公譚訓內載公於相國寺得畢文簡賜本閣帖
甚奇且云文簡以圖書斥遠祖名未中禮因考實錄
淳化二年文簡自考功郎拜學士四年出知昇州然
則乃文簡在翰林時所賜也下用李氏叔固印及李
氏家藏印

嘗考輟耕錄載大梁劉衍卿所見淳化祖石帖每卷
有題識種種今帖中無之然帖上洗去之痕甚多豈
別一本耶即此本耶至云淳化四年六月廿二日賜
畢士安按文簡以四年五月出知外州何至六月復
有欽賜之事此則不可解者也原裝用山和尚錦今
帖仍是山和尚錦蓋錦中五色銀錠紋名山和尚也
所謂祖石帖者帖幾經翻刻而以原帖為祖石非別
有一帖在淳化之前而祖之也陸友仁以李後主昇

元帖為法帖之祖馬傳慶陳簡齋等各襲其說至董
玄宰又以為澄清堂帖是祖帖皆誤也宋太宗當平
定之後出內府之藏令王著摹勒石上以傳後世豈
有反祖本亡國之帖而賜臣下乎

余既得文簡賜本而缺首卷以為大美忌完理固如
是正不必求全閱數日忽有持首卷來售者乃宋搨
之最精者也與宋人汪逵諸君所考無異無論墨色
開卷可辨其所刻卷數板字數相聯而字比諸帖中

字皆大他本所絕無有者也遂令十卷俱足亦異數也戊戌李上林以所藏宋搨第五卷閣帖送閱宋裱斷壞已甚余重裝之題云淳化官法帖真本極其豐逸然帶有開國朴氣他本摹刻雖極精工非失之瘦即失之媚遠不及也吾向見第六卷第十卷上有翰林學士院印及紹聖三年冬至前一日裝題字乃初搨本也又見第七卷第八卷上有賈似道印乃中年搨本也今復見此第五卷上有橫裂文乃晚年搨本

也吾三見而備悉帖之終始惟拈出朴氣二字則潭
絳大觀諸刻一齊拜下風矣戊戌六月十六日退翁
記庚子五月二十四日重閱於集古閣

宋賜本大觀太清樓帖

宋搨大觀帖有黃白紙二種所見不一而黃紙者止
見一部字法精妙宛如手書乃徽宗賜宰相余深者
予初從市賈得二本於江右李梅公得二本萊陽左
旦明得二本浙江張爾唯得一本寶坻曾子固得一

本第一本在以鹽換爛紙者擔頭吳太和收之余再
四購求不與後以銀酒卮十件易得止缺第九本聞
杭州姜滙思有此本雖非黃紙者然係初搨余有顏
魯公大字麻姑壇記帖世無二本姜欲得之更益以
宋人畫卷乃相易而十卷適完按此帖在宋時莆田
方楷曹以百萬購之不得後年久散亂王澐翁多方
湊合始成全帙今兵火之後業已散亂如曩時而復
珠聯璧合豈非神物在世有鬼神呵護之以至是乎

王澐翁有手跋極詳

宋搨絳帖

絳帖第五第六第七第八共四卷乃宋人方楷所藏
本又第六卷上有水精宮道人印乃趙子昂所藏本
皆紙墨精妙絳帖之最佳者也按絳州法帖二十卷
乃潘師旦用淳化帖重摹而參入別帖視宋人翻刻
閣帖此最精采師旦尚哲宗秦國公主又名潘駙馬
帖潘自能刻石雖井欄堦砌皆徧刻無餘故段數最

多或長尺餘者師旦死二子析而為二長者負官絳
沒十卷於庫絳守重刻下十卷足之謂之東庫本幼
者復重摹上十卷亦足成一部於是絳有公私二本
靖康兵火石並不存金人百年之間重摹至再南渡
後潘氏真本已稱難得今傳世者大約皆權場中翻
刻所謂亮字不全本新絳本北本是也如方趙二公
藏本真此時之星鳳矣余又於王長垣寓見方楷所
藏第九第十二卷而第九卷首頁斷損處與單炳文

所考脗合單炳文云淳化官本法帖今不復多見其
次絳帖最佳而舊本亦已難得嘗以數本較之字畫
多不符某家所藏舊本第九卷大令書一卷第四行
內面字右邊轉筆正在石破缺處隱然可見今本乃
無右邊轉筆全不成字其面字下一字與第五行第
七字亦不同又第七行第一字舊本乃行書正字今
本乃草書心字筆法且俗余所見九卷與單考無異
信乎方氏所藏本為當今第一即趙本雖真亦覺墨

色少遜其餘上有日月字等號者不足言矣

潭帖

甲申後余見潭帖最多有初刻本有私第本有碑匠
家本有新刻本有三山木本皆潭也而以劉丞相命
僧希白所刻者為最今所藏第三第四二卷乃希白
所摹刻者故獨存之字法清勁不俗不媚絳帖之下
屈指惟此帖耳昔蘇子瞻桂帥程欽之家見潭帖謂
希白作字自有江左風味故長沙帖比淳化待詔所

摹為勝世俗不察爭訪閣本誤矣子瞻善書者乃以
為潭勝閣帖何比擬失倫耶蓋子瞻之書從唐人顏
魯公楊少師入手不深究晉古故其言如是信乎鑒
帖之難也閣中不收顏魯公猶之文選中不收蘭亭
叙蓋當日豈無見而然政難與世人深語耳

定武禊帖肥本

余生平酷愛蘭亭叙不啻昔人所謂有蘭亭癖者然
求一真定武本三十年無所遇所收者宋人翻刻本

至於唐石宋搨憂憂乎難言之矣南和白侍御抱一
家傳一本是趙子固藏本所謂落水蘭亭也其本舊
稱闕行五字未損神韻渾淪世間第一鴻寶侍御由
林縣令徵為御史此帖不一日去手壬午余自楚中
典試回侍御招余飲出此帖侑觴侍御為余門人余
不敢一語贊恐侍御疑余欲得之也既而世道滄桑
侍御避地會稽余次兒道楷亦就婚在彼每出帖相
示輒言不能令余再見之慘然不樂越十五年侍御

隱居山中學出世法忽遣一介之使持帖遺余退谷
中謂入山來一切俱棄豈可獨留此物以累清虛乎
余意不欲收使者不肯持回適有唐僧貫休所畫羅
漢卷神奇絕世乃以遺之覺三十年大願一旦豁然
而故人高誼時時在我心目間也

趙子固所藏蘭亭乃姜白石舊物後有白石跋云嘉
泰壬戌十二月因與鄉人湯伯升過董道人許見此
禊帖知是烏臺盧提點者所藏定武舊刻後數日雲

後更欲雪上車寒凜因詣董買得之又跋云廿餘年
習蘭亭皆無入處今夕鐙下觀之頗有所悟漫書於
此此帖後歸於雪川蕭氏在其家二十年又歸于俞
玉鑑家又歸於高幹辦家趙子固託滿師以半萬券
得之舟過昇山風厲帆壞子固抱帖立淺水中曰蘭
亭在此餘不足惜也乃自為跋數百言以記之末云
首尾三十年心好目玩終獲為我物幾死猶不恨也
人其可以輕視乎余有此哉其篤好之如此

趙松雪跋云古今言書者以右軍為最善評右軍之書者以禊帖為最善真跡既亡其刻之石者以定武為最善然而紙墨有精疏拓手有工拙於是優劣分焉此本紙墨精拓手工在定武中豈非至寶耶又云吾觀禊帖多矣未有若此本之妙者此本後或歸子昂也

定武禊帖瘦本

瘦本定武帖缺角處有柯九思印蓋其所藏也姜白

石言蘭亭石本以有鋒芒稜角為勝此本羣帶右流
天五字已缺而鋒穎神采奕奕搨法之最工者也濟
南邢子愿曾翻刻之視此相去千里矣甲午始來予
家余曾題之云昔人謂評蘭亭如聚訟其實有不然
者蘭亭之有定武如衆星之有斗羣峰之有嶽也舉
目可辨寧待聚訟乎蘭亭之妙法度悉備而不以法
見神力俱足而不以力見所謂純綿裹鐵此真是矣
宋人極力規撫不下百本或學其純綿而失之嫵媚

或學其裹鐵而失之硬直即面貌已遠况精神乎此
本在趙中舍士禎家濟南邢太僕得之太僕歿歸于
新城王氏兵亂潞川人以五斗米易得攜至京師不
知重也劉安丘見之嘆賞其人乃珍秘之時余物色
定武帖不得再四購求不許其人愛余唐人維摩說
法圖及宣鑄乳爐乃彼此相易未幾趙子固所藏五
字未損本亦至子固本肥此本瘦蓋紙有厚薄濕燥
之不同定一石也於是字內秀氣盡在吾几硯前矣

余未見趙柯藏本之先日所服膺惟國學本此本明
初出於天師菴土中送至國學字法道秀氣味深厚
宋人諸家所臨遠不及之每疑燕京自石晉後淪於
境外此石何時所刻何時入土定在石晉以前姜堯
章云定武本在官庫中熙寧中薛紹彭刻一副本易
之取原石刻損五字以歸此本五字未損或薛氏所
刻副本乎又云大觀間詔取薛氏所藏石龕置宣和
殿內丙午敵至與岐陽石鼓俱載而北今石鼓具在

而蘭亭何在此本五字未刻損非薛氏所藏石也蓋定武今之定州去京師不遠薛氏所刻副本金元人移之於此理或然也

宋刻石今存者一為穎上本相傳穎上井中夜放光如虹縣令異之使下探得蘭亭及六銅壘一為長治本崇禎初陝西苟好善令長冶掘地得蘭亭及舍利數顆苟與余同官沛梁時曾以搨本見遺今石已在苟君家矣余所見前人集本如宋理宗御府所集最

為精工每刻玉池皆用御府圖書其一百一十七刻
俱全在故內今零散不可問矣又南宋丞相游似所
集亦百餘本今西川胡菊潭先生所收二三十本後
皆有手題用景仁及克齋圖書其中有御府領字從
山本極為精采余手摹之刻石置硯山齋

右軍黃庭經

黃庭經傳世者少佳本褚河南臨者舊稱第一然石
缺其半乙酉之春從市買得宋裝小冊一函展視用

筆之妙宛如手書其墨色搨工俱絕上書御府古石
刻蓋唐石而宋裝也為宋高宗所鑒賞上有內府圖
書印及奉華寶藏印劉夫人掌內書記居奉華堂凡
有上品書畫始用其印此帖誠不世之珍每晨坐小
窓下旭光滿室開卷欣然蓋十五年於茲矣

二王洛神賦

右軍所書洛神賦世絕不傳大令亦不見全本此石
不知何時所刻筆致古逸真翩若驚鴻宛如游龍世

目所不經見者合裝成帙余曾有題云向聞王右軍
有所書洛神賦求之二十年勿獲寓目即大令洛神
亦止見宋搨十三行耳丁亥之春同錢

闕名於報國

寺松下見右軍洛神錢咋舌稱為異寶越數日復見

大令全文二王妙蹟一旦完聚真異數也宋人董廣

川最稱該博其書跋云逸少此賦當以為第一今無

復存者但子敬所書猶未可以伯仲間論也又云昔

馬澄評右軍書謂勸進洛神賦諸書皆作今體知逸

少嘗書此賦子敬當是習其家學耳是廣川止見大
令洛神未見右軍書也今併子敬書亦無復存者矣
名蹟在世有日減無日增可慨也余行年六十始獲
覩此良厚幸矣退翁記于西山之煙霞窟

大令洛神帖後有元人跋云子敬書洛神如龍如鸞
莫可踪跡世代以來咸知所寶或以十三行或以八
行為珍秘其全文不可復得蓋可知已此刻具其文
可想像也更當兵亂臨攬寧不慨然至正二十六年

歲在丙午五月二十一日跋是日為小暑節天氣蒸
雨久之數點而止華蓋叟記

澄清堂帖

澄清堂所刻皆右軍書計十卷黃長睿謂唐賀季真
手摹者季後主得之刻石澄清堂極其精善遠在淳
化閣之上惜世無傳者余僅得第一第二第四共三
卷然王氏書法備於是矣是帖余付之樸兒置天津
海雲閣戊戌五月余同內人觀海取此帖舟中一日

數十展記舊所跋

李後主刻此帖後宋太宗見而悅之因刻淳化閣相

敵至於神骨風致固非王侍書所能辦耳

五月二十
五日海門

每
中

書家草法宜入規應矩力能扼腕處處停筆為佳所
謂忙中不及作草也此法惟右軍獨據其勝而澄清

帖悉傳其神

楊村
每中

舟至河西務司關者胡君亟欲相晤以舟小有內眷

辭之乃出精楮求書並贈其先人震亨所著書余喜
為臨此帖覺腕力差勝蓋原本極佳窺其幾微便勝
數倍此名帖之足寶也

河西務
舟中

吾行年六十始知草法友人陳石雲窺其旨而未熟
王孟津熟矣而未得其法蓋作草最忌連綿子敬所
以不及右軍細玩澄清帖思過半矣

泊舟張家灣夜
半大雨挑燈記

此

王右軍臨鍾繇力命帖墓田帖

右軍所臨鍾太傅書乃南唐墨寶堂石神韻俱全信乎其為墨寶也太傅字形多匾闊帶有隸意右軍但以已意臨之不區區求形相之似也古人臨書惟欲發露自己精神不肯寄人籬下往往如此趙子昂云蘭亭與丙舍帖絕相似乃王自似王非王之似鍾也

王右軍黃庭經

余有御府本黃庭經特為寶重又得宋搨殘闕本乃褚河南所臨宋高宗刻之禁中米元章所謂天下第一

一也雖存者僅半然不失為寶今行世乃吳通微書
視此不啻霄壤矣

王右軍樂毅論

樂毅論是王右軍親書於石以貽後人者唐太宗取
入御府甃昭陵中後溫韜盜發舊石已碎宋學士高
紳以鐵束之其末獨存海宇此本是也歐陽文忠云
其石高學士之子弟質錢於富人而富人家失火遂
焚其石趙德父云石未焚後在郎官趙竦家木匣貯

之極為珍惜親舊有求墨本者必手摸以遺之後不知所在近人李日華有一本題一脩字傳為歐陽重刻然世亦罕見今所傳行者乃宋人王著偽書耳

王右軍東方朔畫贊

貞觀所購大王書評定以黃庭第一畫贊第二則知此帖唐時尚在御府所謂殉葬王敬仁乃偽也書法挺勁與他書稍異唐初諸賢無不自此入手而柳誠懸得之為多觀護命經固全用其法也

王右軍曹娥碑

宋搨曹娥碑乃宋高宗御府本書法靜婉貞淑如覲
其人書事至此真可傾國昔趙文敏評定其墨蹟曰
如親見呂仙聽吹玉笙可以稱量天下之書詎不信
然

六月七日為初伏天氣蒸雨數年來無此奇熱也閱
此帖殊覺清風習習不啻赤脚踏層冰也

王右軍筆陣圖

相傳衛夫人有筆陣圖右軍題其後累代皆以為右軍書余觀其論書語殊淺薄尚不及孫虔禮而書法亦遠遜右軍他書殆後人妄為之耳趙子固云學書必先定間架若論間架莫平正於此矣操觚者所必資也至孫虔禮云既知平正務追險絕是又在人自得何如耳

王右軍十七帖

唐文皇收右軍遺跡率以一丈二尺為一卷因首有

十七字故名十七帖李後主得賀知章臨本刻之澄
心堂大觀中又刻之太清樓俱精工至唐人雙鈎墨
跡後有勅字者萬曆中在京師王思延家濟南邢子
愿借之上石亦甚蒼勁有致不遜宋刻國變後北石
不存後人恐未得見也

晉人以書擅當代然見之碑板無一佳者至周孝侯
碑不知何人假之為右軍書且其文謬妄前人駁之
詳矣不足存也

又

宋本淳化閣帖

乙酉賈人持閣帖第十卷來看上有水晶宮道人印
是趙文敏家物文敏跋云淳化中詔翰林侍書王著
以所購書絲三代至唐釐為十卷摹刻秘閣題曰上
石其實木也既成賜宗室大臣人一本自此遇大臣
進二府輒墨本賜焉後乃止不賜故世尤貴之黃太
史曰禁中板刻古帖皆用歙州貢墨墨本賜羣臣今

都下用錢萬二千便可購得元祐中親賢宅借板墨
百本分遺宮僚用潘谷墨光輝有餘而不甚黧黑及
有木橫裂文士大夫不能盡別由此觀之刻同而墨
殊亦有以也甲申歲五月余於書舖中得古帖三卷
第二第五第八明年五月又得七卷多第八缺第九
六月以其多者加公權帖一卷於錢塘康自修許易
得第九卷始為全書雖墨有燥濕輕重造有工拙皆
為淳化舊刻無疑是可寶也自太宗刻此帖轉相傳

刻遂遍天下有二王府帖大觀太清樓帖紹興監帖
淳熙修內司帖臨江戲魚堂帖利州帖黔江帖卷帙
悉同又有慶曆長沙劉丞相私第帖碑工帖尚書郎
潘師旦絳州帖工庫帖稍加損益卷帙亦異其他瑣
瑣者又有數十家而長沙絳州帖最知名要皆本此
帖書法之不喪此帖之澤也

王大令十三行

余有宋刻洛神十三行精采如手書董玄宰云十三

行真蹟元時在趙文敏家使我得之則不啻也一日
得見文敏所書跋云晉王獻之所書洛神賦十三行
二百五十字人間止有此本是晉時麻牋字畫神逸
墨彩飛動紹興間極力搜訪僅獲九行一百七十六
字所以米友仁跋作九行定為真蹟宋末賈似道執
國柄不知何許復得四行七十四字欲續於後則與
九行之跋自相乖忤故以紹興所得九行裝於前仍
以紹興小璽款之却以續得裝於後以悅生胡廬印

及長字邱欸之孟頫數年前見此神物托集賢大學士陳公顯委曲購之既而孟頫告歸延祐庚申忽有僧持陳公書並此卷見遺陳公誠磊落篤實之士不失信於一言豈易得也因併及之又有一本是宣和書譜所收七璽完全是唐硬黃紙所書當是唐人臨本後有公權兩行云子敬好寫洛神賦人間合有數本此其一焉寶曆元年正月二十四日起居郎柳公權記吾不敢以為真蹟蓋晉唐紙異亦不可不知也

智永千文

智永嘗書千文八百本散在江南諸寺今尚有墨蹟
存世宋大觀中薛氏以長安崔氏所藏真蹟刻石極
其精善余所收乃當時舊搨不待驗律呂為律呂及
有方綱摹字而知其妙也董玄宰云智永為虞世南
之師作永師書當思永師用筆乃不笨鈍作永興書
當思永興用筆乃不板結吾家有趙文敏六體千文
惟楷書純類智永蓋以虞伯施參合為之遂為古今

之絕

智永千文在宋原有善本歐陽文忠所見本有後人
妄補者遂去二百六十五字蔡君謨猶曰未能盡去
豈歐陽公未見善本耶則薛氏之功大矣

褚遂良同州聖教序記

同州河南所書聖教序記與慈恩寺大小畧同而同
州饒骨慈恩饒韻如出兩手而同州尤有墜石驚電
之勢後云龍翔三年癸亥六月廿三日建大唐褚遂

良書在同州倅廳按公永徽元年庚戌出為同州刺
史三年還朝六年貶潭州顯慶二年貶愛州三年卒
於貶所至龍朔癸亥卒已六年矣安得復與書事蓋
非手書上石公歿同人不勝桐鄉之思復摹刻官所
實記所建歲月初不計其存亡其兩地字跡不同者
摹手異耳

褚遂良雁塔聖教序

長安慈恩寺有河南所書聖教序記分為二碑嵌雁

塔門東西兩傍最完好序云永徽四年十月十五日
建中書令臣褚遂良書記云永徽四年癸丑十二月
十日建尚書右僕射上柱國河南郡開國公臣褚遂
良書此自同州召還後筆稱臣者以御製文非奉敕
書也

僧懷仁聖教序

懷仁聖教序乃集右軍書宋人極薄之呼為院體院
中人習以書誥敕士大夫不學之也趙子固云其中

逸筆不知懷仁從何處取入使人未學他書先學此
殊為可惡子固深於書學者故其言如此至近時乃
大不然者視此帖不斷本如瓌寶收藏家學與不學
俱購求一本以侈人而秦中士夫為甚有著金石史
者謂聖教序較定武蘭亭相絕千里可為噴飯真所
謂夜郎王不知漢大彼或未見真定武耳蘭亭是右
軍第一妙蹟不特此也即宋所臨諸本無不各具一
風格陸子淵所謂原本既高得其一枝半節無不善

者人能學一分即有一分之得力無不卓然大雅惟一學聖教序則渾身板俗即唐人吳通微號能書者亦受此累况其他乎黃長睿云學弗能至自俗碑字未嘗俗夫碑字不俗何以學之輒俗使學蘭亭者有是乎長睿深於書學者失言矣余初得一不斷本繼於故內復得此本更完好字法纖毫逼具蓋唐搨也秦人王文含見之嘆不釋手

孫過庭書譜

唐初諸人無一不摹右軍然皆有蹊徑可尋獨孫虔
禮之書譜天真瀟灑掉臂獨行無意求合而無不宛
合此有唐第一妙腕余垂髮時見丈氏停雲館帖中
有此書愛之後見宋人刻本以為觀止矣甲申忽覩
此卷驚嘆欲絕以市賈索價太昂不能收惜惋竟日
卷上有宋高宗徽宗雙龍璽及宣和小璽卷中五垂
也下少一百三十字漢末張伯英下少一百六十八
字虞伯生臨秘閣帖補之後越六年復見于西川士

夫家以余愛之特甚乃許購得已將虞所補並後跋
割去時一披閱覺宋人所刻尚在影響之間而停雲
館不足言矣

宋秘閣續帖書譜

書譜石本以秘閣為勝視墨蹟稍肥然神韻宛存非
他刻所能及也余覓之經年始得此本惜首缺十餘
行

宋太清樓書譜

太清樓書譜視秘閣稍瘦其率意處無不與墨蹟相
合道君與蔡元長皆精於書法者故工緻至此余覓
之數年乃得此本

宋刻楷書書譜

孫虔禮書譜余所見墨蹟及宋人刻本皆草書也然
又有正書本字法勁秀大有鍾王遺意前人所絕未
語及也後有嘉定字宣彼時上石乎虔禮書有訛字
皆從傍註之吳說一跋書亦工惜不全吳說字傳明

南渡後擅書名跋云若評書法當以鍾王為初祖欲學王法當以過庭為指南此確論也

右軍裹鮓帖

裹鮓帖十八字是唐人雙鈎古人草書以右軍為第一神行官止備畫作草之法如大令之連綿已失家學矣米海嶽書史載此帖為薛道祖所收今帖上有道祖自書名並弘文印又元章一印或在道祖家見之而用此印乎後米友仁手題字亦勁拔元人下臨

安得之於宋又有亡宋南廊庫長條記滄桑後西川
柳鳳占收得余借之上石後回揚州竟歸余又于山
西張氏寓見右軍此事帖亦唐人雙鉤與裏鮓帖相
類云是太倉王氏家物紙尾有賈氏悅生印曾入金
源御府又有明昌諸印題簽隸書吳匏菴云是金章
宗手筆余嘗言世無晉跡得唐人鈎摹本足矣不然
得米老臨本亦足矣趙松雪自負賞鑒者如右軍思
想帖乃雙鉤本也大德中子昂同霍肅周密郭天錫

張伯淳廉希貢馬昫喬竇成楊肯堂王芝鄧文原觀
於鮮于伯機池上子昂跋謂右軍真蹟有龍跳天門
虎卧鳳闕之勢觀者咨嗟歎賞神物之難遇是不知
為雙鈎本也又右軍大道帖十字是米南宮所臨至
元中子昂跋為世間神物有能襲片石刻以傳遠僕
願供奉揭之役是亦不知為臨本也蓋世斷無晉人
之跡華氏刻真賞齋帖謂薦季直表乃鍾元常墨蹟
豈其然乎

王子敬地黃湯帖

子敬地黃湯帖一紙後有秋壑印文三橋跋謂其祖
得之龍游士紳家衡山先生每以自隨王雅宜見而
健羨乃歸之及雅宜歿後歸丈氏三橋稱為唐鈎之
最佳者余細玩之筆意全是米老知為海嶽臨本又
如右軍東山帖乃米老書吳江村竟刻入王帖中墨
蹟在嘉禾曹秋嶽處裝入米卷余借之刻米帖中

六藝之一錄卷一百六十五

欽定四庫全書

六藝之一錄卷一百六十六

錢唐倪濤撰

法帖論述三十六

元陳繹曾法書論

鍾繇力命剋捷宣示

王羲之樂毅書贊黃庭告誓霜

寒 王獻之洛神

六朝不知名氏曹娥羊叔子遺教

陶弘景瘞鶴舊館壇

智永千文

虞世南孔子廟

碑 歐陽詢九成宮化度寺虞恭公皇甫 褚遂良哀冊

聖教 張旭郎官 顏真卿麻姑壇放生池中興頌干

祿字東方贊 柳公權陀羅尼

右真書

鍾繇丙舍吳人羸頓長風 王羲之蘭亭極寒毒熱官

奴快雪來禽奉橘慈蔭聖教序開元寺 王獻之地黃

歲終衛軍授衣阿姨鴛羣歲盡夏日奉對思戀天寶吳

興山陰東家轉勝相過鴛邊觸事夏節恨深炙礮石

駱驛月內尊體 謝安八月五日 褚遂良枯樹星霜

生
李邕嶽麓沙羅樹雲麾將軍東林寺張從申玄靜先

右行書

淳化法帖諸帖之祖王著模刻深得古意不見古跡得
此足矣

絳帖淳化之子潘師旦模刻骨法清勁足正王著肉勝
之失然駁馬露骨未免羸瘠之失

潭帖淳化之子希白模刻風韻和雅血肉停勻但形勢

俱圓頗乏峭健之氣

大觀帖淳化之弟蔡京模刻京沈酣富貴恣意粗率筆
偏手縱非復古意賴刻手精工猶勝他帖

太清樓續閣帖劉燾模刻工夫精緻亞於淳化肥而多
骨求備於王著乃失之粗硬遂失風韻

戲魚堂帖劉次莊模刻在淳化翻刻中頗為有骨格者
淡墨搨尤佳

武岡 修內司 福州諸帖皆有可觀

鼎帖石硬而刻手不精雖博而乏古意

星鳳樓帖曹之冕模刻清而不穠亞於太清續帖

玉麟堂帖吳琚模刻穠而不清多雜米家筆仗

寶晉齋帖曹之格模刻星鳳之子在諸帖中為最下

百一帖王曼慶模刻筆意清道雅有勝趣恨刻手不精

湯允謨古今石刻辨

北紙用橫簾其質鬆而厚不堪滲墨以墨拂之如薄雲
之過青天猶隱隱見紙白處凡北碑皆然且不用油蠟

可見

北墨多用松煙故色青黑更經蒸潤則愈青矣南墨用油煙故色純黑且有油蠟可辨碑文欲辨墨色皆倣此徽宗御府所藏書其前必有御筆金書小楷標題後有宣和玉瓢御寶淳祐壬寅於臨安客舍見永嘉一士人家藏一帖乃唐人硬黃倣右軍書前有金字御筆云王右軍書 簽後有宣和玉瓢樣御寶 以紙加碑上貼于窓戶間以游絲筆就明處圈却字畫

填以濃墨謂之響榻然圈隱猶存其字亦無精彩易見

世謂紙之精者可支千年今去二王方八百餘年而片紙無存不獨晉人如唐世善書之蹟甫三百餘年亦希如星鳳何也嘗考其故蓋物之奇異常聚於富貴之家或一經亂離水火則羣舉而失之非若他物散落諸處猶有存者桓玄之敗取法書名畫一夕盡焚所喪不知幾何良可悲也

太宗朝搜訪古人墨蹟令王著銓次用棗木板摹刻十卷於秘閣故時有銀錠紋前有界行日錄者是也當時李廷珪墨拈打措之不汚手乃親王宰執使相除拜賜一本人間罕得當時每本價已八百貫文至慶厯禁中火災其板無存矣世所見閣帖多乏精神有絳帖以閣本重摹而秘閣反不如絳帖精神乎則此可以觀矣絳州法帖二十卷乃潘舜臣用淳化帖重摹而叅入別帖然并今所見閣本精神過之舜臣事力卑微而自能

鐫石雖井闌階砌皆遍刻無遺所以段數最多或有長尺餘者舜臣死二子析而為二長欠官錢沒入上十卷於絳州絳守重摹下十卷足之幼者復重摹上十卷亦足成一部於是有公私二本於絳州矣靖康兵火石並不存金人百年之間重摹至再慶元間余官守長沙嘗見舊宰執家有南渡初親自北方攜得舜臣原刻本未分析時二十卷珍藏非得二十緡官陌不肯與人乃北紙北墨精神煥發視金人所摹者天淵矣淳化閣帖既

頒行潭州即摹刻二本謂之潭帖余嘗見其初本當與
舊絳帖雁行至慶曆八年石已殘缺永州僧希白重摹
東坡猶嘉其有晉人風度建炎敵騎至長沙守城者以
為砲石無一存者紹興初第三次重摹失真遠矣

劉次莊摹閣帖于臨江用工頗精緻且石堅今不曾重
摹獨二本略殘缺然拓本既多頗失鋒芒今若得初本
鋒芒未失者當在舊絳帖之次新潭帖之上然其釋文
間有訛處

上蔡臨摹絳帖上十卷雖比舊絳帖少十卷而迥出臨江帖之上余嘗見於沙西府劉曦家

武岡軍重摹絳帖二十卷殊失真且石不堅易失精神後有武臣守郡嫌其字不精采令工人即舊畫再刻謂之洗碑遂愈不足觀其釋文尤舛謬然武岡紙類北紙今東南所見絳帖多武岡初本且驗其殘缺處自可見武陵帖亦二十卷雜取諸帖重摹而參以人間未見者其間惟右軍小字黃庭經最妙他帖所無也彭州帖亦

刻歷代法帖多武岡初本十卷不甚精彩紙亦類北紙人多以為北帖

元祐中奉旨以淳化閣帖之本續所得真蹟刻續法帖原本在禁中後置太清樓今會稽重摹本亦不減古絳帖也

淳化秘閣帖板雖禁中火焚不存而真蹟皆藏御府至徽宗朝奉旨以御府所藏真蹟重刻於太清樓而叅入他本竒跡甚多其中有蘭亭帖者是也名曰太清樓帖

高宗聖草天成奎文煥發肆筆成書垂法萬世壽皇重
規疊矩宸畫尤妙兩朝訪遺書多得晉唐舊跡至淳熙
間奉旨以御府珍儲摹勒入石名淳熙秘閣續帖置秘
書省寶慶火災其石不存

汝帖乃王宋輔道摘諸帖中字牽合為之每卷後有汝
州印為黃伯思所培擊不直一文今會稽又以汝帖重
開謂之蘭亭帖其實汝之靡耳

宋宣獻公刻賜書堂帖于山陽金鄉首載古鐘鼎識文

絕妙但二王帖詮釋未精今石不存

胡龍學世將刻豫章法帖種種精妙今已重摹但後有小隸書范忠宣公戒子弟書是本初許提舉間刻二王帖於臨江摹勒極精然少詮釋廬江李氏刻甲秀堂帖前有王顏書多世所未見但繼以本朝名公書頗多大抵今人書自當作一等耳曹尚書彥約刻星鳳帖於南康軍雖以衆刻重摹而精美不苟並無今人書韓郡王佖冑刻羣玉堂帖所載前代遺跡多有未見者後亦多

今朝人書韓敗後入秘書省

蘭亭帖世以定武本為冠自薛向作帥別刻石易去於
原石鐫損天流帶右四字以惑人然原本亦有法可辨
鐫損四字一也管絃之盛字上不損處若八字小龜形
二也是日也觀宇宙一行之間界行最肥而直界伸脚
十字下出橫闌外三也管絃之盛盛字之刀鋸利如鈎
四也痛字改筆處不模糊五也興感之由由字類申字
列叙之列其監如鐵釘此其大略也然定武又有肥瘦

二本而鐫損者乃瘦本為真定武無疑何以知之今復
州本以真定武本重摹亦鐫損四字其字極瘦王順伯
尤延之爭辨如聚訟然瘦本風韻竟勝豈能逃識者之
鑒其瘦本今不存宣和間就薛向家宣取入禁中龕於
睿思殿東壁建炎南渡宗澤遣人護送此石至維揚寇
犯維揚不知所在或云金人以毡裹裹之車載而去
世傳二王帖皆以真蹟摹勒獨樂毅論就石書丹其石
在高學士紳家已殘缺至海字止後轉屬趙孟頫今重

摹者後猶有趙立之印予嘉熙庚子自嶺右回至宜春
見原本於一士人家用北紙北墨無一字殘缺而清勁
道媚正類蘭亭字形今世所見重摹本幾小一倍此蓋
齊梁間拓本真希世之寶也

元常力命帖惟此本與潭州本佳他無足取

顏碑在南方者甚多麻姑壇記吳興石柱記舊本干祿
字妙喜寺西林題名皆絕品也歐陽小字千文在邢州
溫彥博墓誌在東京九成宮碑仲夏蘭若二字帖化度

寺碑丹州刺史碑並在北方會稽高續古家有重摹寺碑咄咄逼真

余遊瀟湘歷衡潭永金道五郡並無古刻惟道州有漢綏蠻校尉熊君之碑若浯溪中興頌乃唐中世所立耳亦已石乏工人每因舊跡加洗刻以為衣食業故愈失真

徐騎省鉉深得古小篆法有篆千文刻石南昌精妙無愧古人今已重摹失真

雁塔題名帖有北本有彭州本然北本為上彭本頗失
真

余嘗見南岳一僧云衡山多秦漢以來碑在林莽蔽翳
間寺僧懼為官司所擾匿不敢言亦不敢遷至屋下故
愈為霜露剝蝕良可歎也

山陰僧偽作王大令保母墓志佞曹以千緡市其石予
疑其贗作殊無一點大令氣象及見東坡所作子由保
母墓志語則僧果偽也

俞紫芝臨十七帖後錄

十七帖凡廿七條逸少書中龍也張彥遠以為王草書
中烜赫著名帖信然自昔相傳之周益州者蓋其中間
蜀事為多玩味帖語類多晚年所作政在會稽時也第
十六條云胡母氏從妹平安故在永興居去此七十也
按吳志永興縣其地為今之蕭山云右跋語載會稽志
右王逸少十七帖乃先唐正刻本今世間有二於弓尾
有十七帖草書晉右軍真蹟貞觀中裴業進上太宗詔

下使能搨書僧智辨撫之親賜智辨一本將令出外使
人間流傳之從此本出之後年深智辨既沒其本遂入
法海僧曇昉極寶之不輕出余知之遂竊就昉求之出
萬計方獲太宗以草書卷頭有十七日以此呼之十七
帖其下實有廿五帖一百二十行一千一百二十四字

鍾紹京記

唐中書令封越公

黃長睿東觀餘論書十七帖後一則見前

翰林侍書王著有寫本驗其數蓋二十七帖與鍾紹京

異矣今本除真書菓子名畫一百二十九行李建中續
記

至正廿又一年仲夏初吉紫芝生臨於黃岡之行軒

王弇州論閣帖

米元章有書才而少書學黃長睿有書學而少書才以
故評隲古人墨刻真贋亦有相牴牾者然長睿引證各
有據依不若元章之孟浪也如謂鍾太傅尚書宣示為
右軍臨白騎遂帖為大令臨蓋不惟太傅宣示已殉王

脩莖而開元中滑臺人家用右軍扇臨宣示大令臨白
騎二帖應募入內府其事甚明至謂長風帖為逸少少
年未變體書蓋以右軍別帖有長風范母子語可證也
此外辨右軍自適得書至慰馳竦耳酸感至此如下瘧
宰相安和噉豆鼠伏想嫂等闊別稍久不得臨川初月
二日至前從洛白耳鯉魚蔡夫人家大小悉佳濶轉阮
公故爾月半邊欲遺書大令玄度時來極熱敬唯服油
復面悲積嫂等帖皆非真或以辭氣太凡或以書法非

妙或即其人其事駁之俱當他如辨江叔及藝韞多才
帖為唐高宗衛夫人帖為李懷琳褚遂良甥無薛八侍
中山河帖為枯樹賦中語李斯書為陽冰裴公碣內字
右軍備官而行為唐人集右軍書賈曾送張說文皆妙
有事理真書家董狐也

米元章以閣帖張伯英知汝殊愁及大令吾當托桓江
州為張伯高書黃伯思亦斷以為然而云數往虎丘祖
希時面祖希張玄之字大令時人以為伯高書二王帖

辭耳按此帖既有祖希時面語與疾不退至分張同結
法安知非大令縱筆耶而必於伯高也及考張懷瓘書
斷稱張融正兼諸體於草尤工齊梁之際殆無以過或
有鑒不至者深見其有古風多誤寶之以為張伯英書
也而搨本大行於世又按融本傳嘗對孝武帝曰不恨
臣無二王法恨二王無臣法然則此書又安知非張融
筆耶黃米懸斷為伯高書不若吾之懸斷乎愈光也
伯英殊愁體太今而乏古大令疾不退至分張筆過流

而少節或以此疑非二公書可也元章論書見右軍稍大而逸者便以為子敬見伯英近今者與子敬近縱者便以為伯高藏真愚又推黃米之旨謂伯高僅有章法而無變法子敬僅有破體而無狂草則不敢信也按張懷瓘明言章草之書字字區別張芝變為今草拔茅連茹上下牽連或借上字之下而為下字之上奇形離合數意兼包惟王子敬明其心指故稱一筆書者起自伯英也又云伯英叛為今草天縱尤異率意超曠無惜是

非至於蛟龍駭獸奔騰拏攫之勢心手隨變窈冥而不
知所如又云子敬如蹴海移山翻濤破嶽懸崖墮石驚
電遺光此豈非草聖之極耶考前後書亦未必似伯高
蓋伯高時有肥筆渴筆不若是之勻和也若托桓江州
一書又多逸少語子敬亦不合書之覺思光為近至於
右軍雖結構緊密而變化靈異又不可以一節為拘也
閣帖真書自鍾太傅宣示外獨有王世將僧虔四疏啟
耳行草自二王外獨有皇象索靖及亮白一紙耳何也

以其體最古雅不落塵也

千古楷行之妙無過鍾王鍾王之跡妙者宣示樂毅蘭亭而已樂毅論搨本佳者猶可什倍他刻也

董玄宰論帖

唐模右軍真蹟以十七帖為致佳余臨數十本皆為好事者取去亦復有贗本如此本方稱意乃以王方慶進帖筆法參合用之所謂萬歲通天帖是也

余曾有右軍行穰帖真蹟十五字正是十七帖一種書

及武林楊侍御自安福傳來唐模絕交書與行穰帖同
中缺鸞字乃悟為右軍書蕭齊所模避子鸞諱而後人
誤以為李懷琳耳

李君實評帖

沈存中云唐太宗力購羲之真蹟唯樂毅論乃右軍親
筆於石而鐫之以為家法者昭陵之殉亦以其石便於
甃耳後溫韜盜發其石已碎用鐵錮之皇祐中高紳學
士之子安世為錢唐主簿存中就其家見之末後獨一

海字竹嬾十年前購得一本正海字獨留本也但其闕
處有斜書修字數個蓋歐陽文忠公再拓本也昔年於
姑蘇韓氏見一絹素臨本相詡以為右軍手書可謂不
識源委者矣

宋黃伯思東觀餘論辨駁古今法書最為精刻乃其辨
黃庭經一節實欠詳審伯思曰黃庭經帖為逸少書僕
考之非也按陶隱居真誥翼真檢云晉哀帝興寧二年
南嶽魏夫人所授惟有黃庭經一篇得存蓋此經也逸

少以穆帝升平五年卒後二年為興寧二年此經始降
逸少安得預書之又按梁虞和論書表云山陰壩釀村
養鵝道士謂羲之曰久欲寫河上公老子緘素已具無
人能書府君能自屈書兩章便合羣以奉羲之為停半
日寫畢携鵝去晉書本傳亦著是說然隱居與梁武啓
又云逸少有名之蹟不過數首黃庭勸進樂毅等不審
猶有存否蓋此啓在著真誥前未之考耳而李太白乃
有黃庭換白鵝之句相習之謬也伯思自以為至當矣

不知右軍寫道德經換鶯又寫黃庭經換鶯自是兩番
事而太白詩亦兩見一云右軍本清真瀟洒在風塵山
陰遇羽客要此好鶯賓掃素寫道德筆精妙入神書罷
籠鶯去何曾別主人一云鏡湖清水漾晴波狂客歸舟
逸興多山陰道士如相遇應寫黃庭換白鶯實互用之
也考道藏黃庭有數種有內景黃庭有外景黃庭又有
黃庭遁甲緣身經黃庭玉軸經魏夫人所出乃內景一
種係楊真人羲寫其外景經老君所作先出行世右軍

所書兩不相溷也張懷瓘書斷張彥遠法書要錄並載
右軍書黃庭六十行褚遂良右軍書目黃庭經書與山
陰道士其時真蹟自在又武平一徐氏法書記親在禁
中見武后曝書太宗所遺者六十餘函有黃庭復何所
疑哉他人無誤正伯思自誤耳

千字文前行書勅散騎員外郎周興嗣次韻考勅命之
制始於唐當是書梁字之誤也又梁武令殷鐵石搨二
王書今大令帖中有稱鐵石者即是殷所書而王著輩

錯著之耳此亦殊非細故黃長睿赦而不攻何也

樂毅論小中有楷黃庭經楷中有小東方朔畫贊五分
中有方丈洛神賦方丈在五分中曹娥碑五分字四分
畫力命表三分畫五分字此書家教典也不講求何由
修證

屠隆考槃餘事

古帖歷年遠而裱數多其濃者堅若生漆以手揩之纖
毫無染蕪之摩弄積久紙面光彩如研古意自然故面

舊而背色長新其側勒轉摺處並無沁墨水跡侵染字
法且有一種異馨發自紙墨之外質薄者揭之堅而不
裂以受糊多耳厚者反破裂莫舉以年遠糊重紙脆故
也今之贗帖效南搨者近似之然以手微抹滿指皆黑
效北搨者敲法入石太深字有邊痕用墨不勻濃處若
烏雲生雨淺者如白虹跨天殊乏雅致大率皆以川扇
紙竹紙用挂灰爐烟瀝和水染成古色表裏溼透兩面
如一試以一角揭看薄者即裂厚者性健不斷矣此俱

以形似求之若以字法刻手敲手搨法過目翻閱雖同
一宋搨而妍醜即別矣矧贋搨乎

吳中近有高手贋為舊帖以豎簾厚簾竹紙皆特妙也
作夾紗搨法以草烟末香烟薰之火氣逼脆本質用香
和糊若古帖臭味全無一毫新狀入手多不能破其智
巧精采反能奪目鑒賞當具神通觀法

古之北紙其紋橫質鬆而厚不甚受墨北墨多用松煙
色青而淺不和油蠟故北搨色淡而紋皺如薄雲之過

青天謂之夾紗作蟬翅搨也南紙其紋豎墨用油烟以蠟及造烏金紙水敲刷碑文故色純黑而有浮光謂之烏金搨

書家藏法帖貞珉後

寒山金石林

余有法書之嗜染成膏肓之疾以為人有蘭宮閔宇二酉五車而不藏名帖不蓄名石即琳琅珠玉異玩奇珍積如丘山堆令充棟都不成佳話然名帖易存名石難得非出於書家手勒非名帖也非出於精工手刻非名

石也余家近藏停雲館法帖貞珉乃文待詔先生為之
水鑿國博和州兩先生為之手勒溫始吳彙章簡甫三
名人為之手刻鏤不計工惟期滿志完不論日第較精
粗凡此諸公每搆佳蹟古搨非窮年彌月不輕摹搨最
後止得一十二卷特以待詔先生父子三人皆握翰墨
宗匠海內以名蹟觀覽者門無虛日是以此帖遂得晉
唐宋元我明劇跡咸萃其中今有遺帖與之相角無不
纖微克肖名公苦心於此逮見且多歷年所總計其時

則春秋閱盡二十有四始克竣工至若右軍黃庭尤三
易石而就首卷小字則名公繼起不易鐫摹且無論國
朝名帖莫可比肩即今遡觀宋元以來淳化大觀戲魚
臨江等帖俱已煙銷莫知何所則此帖不珍更何可珍
此帖不寶更何可寶而今而後吾知法書至此止矣無
以加矣即有精帖必無良工即有良工必無精鑒如是
遇合千古難遭既遭名時復獲名帖可弗寶諸自昔外
家流傳他所皆成和璞歲之甲寅乃歸寒山凡翰墨親

知咸歎希有遂什襲珍藏不輕示人每一春秋止搨數帖以公同好或有真能永鑒者舉而贈之間有以貨財相易者利而與之飾以縑緙裝以名玉定為數種不二其價列之下方

趙靈均寒山金石林

何莊淳化帖記聞

前代法書未有彙成巨帙以為後人楷摹者始獨淳化閣中一帖耳自淳化閣帖一出而後枝流派分不可勝

數故為法書宗匠則莫出此孰意轉相翻摹若子若孫
幾千百本遂令本來面目都成烏有所可想象者徒存
其骨相形似耳然世所稱何莊上下二號最為殊絕今
即有寶之者亦不過如穴鼠之抱黃金宋人之寶燕石
耳如欲溯流尋源於幾千百載之上不可得也今聞之
雲陽蔣敬輿曰此帖在吾外家孫石雲氏知之熟矣蓋
孫氏之祖仕宦燕邸出入內庭其所由來遠矣昔宋季
南遷金人追迫危於泉州舟車狼籍所負而趨者珠玉

繒帛所委而溺者研材碑板耳厥後識者間取鐫摹不
下千萬卽世所稱泉州本是也此以真贋最多魚目夜
光說如聚訟由此而勝國湮沒莫顯及我明時掃除外
患孝高皇帝定鼎留都取緝宇內郡書碑板經籍置之
金陵而此棗本亦入所收矣收而經史百家儲為國家
武庫而此法書視如朽木巍然高閣遠乎文皇遷都燕
北復收圖籍置之成均此則復別置一所依然如故自
此而後無與見聞者歷二百餘年矣而我外祖當世廟

時遊歷館閣見有碑板周匝圍繞金鏤為飾甫數十年
珍異之物因與內臣言之而內臣則悉數其顛末倡為
內府所棄棄之則可取之則擬議橫生矣然可徐圖之
也無何而彼內臣者以毀棄餘材悉收置其廊廡令人
奏請彼處瓦礫朽株宜當委棄上可其請因以廊廡餘
材悉出而歸之孫氏孫氏急拓而公諸同好自謂生平
已握奇貨而是時閣臣某者謂之曰此天朝物輕以示
人敗乃公事盡從此始不以投之水火恐不能完爾軀

也遂以一本徧求天下精工毫髮無忝翻成十卷獨於
數目移勒下方今謂之下號斯時亦止間一拓耳取彼
真本穴地藏之逮世廟晏駕人代綿邈耳目更新掘取
靈秘置之廣堂大厦彼翻摹手左右分置日夕摹拓親
知故舊則以上號僚友則以下如此流傳而穀不再熟
彼司祝融者取而藏之煨燼之中矣神物顯晦豈非天
耶余聞而惜之聊疏其始末以資博古者之異聞

汪珂玉珊瑚網

淳化閣帖無銀錠本

祖帖在世余足跡海內僅見兩三部其中合湊者多皆非初搨內有銀錠紋為後搨無疑原傳宋太宗詔諸大臣購天下名蹟摹勒藏內府故不多傳後又為王著翻刻又差一層矣至著刻者余亦見之前有王著二字然閣本以紙墨為貴此帖紙是澄心堂墨是廷珪有目力者一見了然自明即不多見者亦知神彩奕奕為神物不知何由至江南得藏余齋也可勝欣幸餘清益主人

自識

宋搨淳化閣帖海內無全本惟嘉項庶常有十卷亦史
明古華東沙兩家合併而文待詔為之和會者庶常珍
秘雖千金不與人一觀無論購也今吳用卿忽視余此
十卷紙墨精好華意備全又在項本之上何幸晚生見
此奇寶戊午二月董其昌題

珍觀淳化原本如探龍得珠得未曾有堪與項氏千金
帖並傳陳繼儒題

淳化閣帖行世後一經黃長睿之刊誤再經王弇州之
抨擊而王著幾無處生活長睿既譏其不深書學又昧
古今而弇州直嘲之為手如懸鎚腹無半冊史在且謂
當時三館無紕正者每一開卷便為王著村老供一胡
盧董狐之筆不啻嚴矣而波磔督策隄虞側理不能不
歸美於模搨之工蓋八法所在又何拘時代官位間余
論閣帖惟以墨黑甚於漆字豐穰有神者即為真初搨
本如兩府被賜親贈遺文章家雅語何從沾沾辨之哉

金定四庫全書
卷一百六十六
用卿畱心古法書此帖極為其所珍賞第五卷智果何
氏帖皆全并無烏鎮福清三司殿司之疑也雁門文震
亨題

余昔於安將軍處見此帖紙墨精妙快人心目辛酉秋
余在京陵吳用卿出其淳化閣本示余不覺神情頓還
舊觀東山太白

仙機題為安將軍之藏想安將軍定是大賞鑒家方有
此耳但不知安將軍為何處人謫仙之言亮有所據吳

廷

丙戌中秋余止角里清霽閣東與居停主高君看舊時
月色出淳化無銀錠本示余云是其家玄期所遺玄期
與余自幼金石交知其精於鑒古况得自吳江村在在
稱米家書畫船者兩人宜識拔此帖帖後歸在公給諫
而寶書為左坦因復歸之永為高氏物不啻華氏和合
矣第紙墨如新幸得陳董諸公而鑒定乃離亂後余共
兒淵何幸得獲觀神物哉珂玉識

六藝之一錄卷一百六十六

欽定四庫全書

六藝之一錄卷一百六十七

錢唐倪濤撰

法帖論述三十七

瘞鶴銘

右瘞鶴銘題云華陽真逸撰刻于焦山之足常為江水所沒好事者伺水落時模而傳之往往祇得其數字云鶴壽不知其幾而已世以為難得尤以為奇惟余所得六百餘字獨為多也按潤州圖經以為王羲

之書字亦奇特然不類羲之筆法而類顏魯公不知何人書也或云華陽真逸是顧况道號今不敢遂以為况者碑無年月不知何時疑前後有人同斯號者

也
六一
題跋

右軍嘗戲為龍爪書今不復見余觀瘞鶴銘勢若飛動豈其遺法耶歐陽公以魯公書宋文貞碑得瘞鶴

銘法詳觀其用筆意審如公說
山谷
題跋

瘞鶴銘大字之祖也往有故一切導師之碑可與之

爭長今亡之矣上全

趙景修歸自金陵會於瑞竹藏院凡七人陳元俞楊
元發明叔張德夫覺夫李端叔覺夫出此書相示世
以為右軍書或謂其語不類晉人然卒不能辨也自
歐陽文忠公指華陽真逸乃顧况道號遂知為唐人
書爾後襲前說者必相與排抵殆不復容是正其如
知耳而不知目天下之公患吾知為佳字耳何必紛

紛於唐晉也

姑溪
題跋

邵資政考次瘞鶴銘文

鶴壽不知其紀也壬辰歲得於華闕一字當作亭甲午歲化

於朱方其未遂吾翔闕一字當作寥廓邪冥奪闕二字遽也迺

裹以玄黃之幣藏於茲山之下仙家無闕四字我竹此字

不故立石旌事篆銘不朽詞曰

相彼胎禽浮丘闕二字余欲無言爾闕五字當有雷門二字去鼓

闕一字當作華表留闕二字當為形義唯髻髻事亦微冥爾將何之

解化闕五字又闕五字惟寧後蕩洪波前固重肩右

害莽尸シシ

又闕八字

華亭爰集真侶瘞爾

闕二字或文但止於此未

可知

丹陽真宰

此四字不知其次

右瘞鶴銘資政邵公亢嘗就焦山下缺石考次其文

如左其不可知者闕之故差可讀然文首尾似差可

見雖文全亦止此百餘字耳而歐陽文忠集古錄謂

好事者往往只得數字唯余所得六百餘字獨為多

矣蓋印書者傳訛誤以十為百當時所得蓋六十餘

字故云比數家本為多此銘相傳為王右軍書故蘇

舜欽子美詩云山陰不見換鶩經京口新傳瘞鶴銘
文忠以為不類王法而類顏魯公又疑是顧况云道
號同又疑是王瓚僕今審定文格字法殊類陶弘景
弘景自稱華陽隱居今日真逸者豈其別號歟又其
著真誥但云己邠歲而不著年名其他書亦爾今此
銘壬辰歲甲午歲亦不書年名此又可證云壬辰者
梁天監十一年也甲午者十三年也按隱居天監七
年東遊海嶽權駐會稽永嘉十一年始還茅山十四

年乙未歲其弟子周子良仙去為之作傳即十
三年正在華陽矣此銘後又有題丹陽尉山陰宰
數字及唐王讚詩字畫亦頗似瘞鶴銘但筆勢差弱
當是效陶書故題於石側也或以銘即瓚書誤矣王
逸少以晉惠帝大安二年癸亥歲生年五十九至穆
帝升平五年辛酉歲卒則成帝咸和九年甲午歲逸
少方年三十二至永和七年辛亥歲年四十九始去
會稽而閒居則不應三十二年已自稱真逸也又未

官於朝及閒居時不在華陽以是考之此銘決非右

軍也審矣

東觀
餘論

朱方鶴銘陶貞白書在焦山下石頑難刊且為水泐

故字無鋒穎若掘筆書昧者從而數之深可一笑

全上

張學考次瘞鶴銘文

華陽真逸撰

上皇山樵

闕一本
有書字

鶴壽不知其紀也壬辰歲得於華

闕一字
當為亭

甲午歲化

於朱方天其未遂吾翔

闕一字
當為寒

廓耶奚奪

闕一字

仙鶴

之遽也迺裹以玄黃之幣藏乎茲山之下仙家無

闕四

字我竹

此字不全

故立石旌其事篆銘不朽詞曰

相此胎禽浮丘

闕二字

余欲無言爾

闕五字當有雷門二字

去鼓

闕一字當為華

表留

闕二字當為形義

唯髻髻事亦微冥爾將何之

解化

闕五字

厂

此字不全又闕一字

惟寧後蕩洪流前固重局右

此六字不全又闕八字

華亭爰集真侶痊爾

闕四字或但止於此未可知也

丹

陽真宰

此四字不知其次

痊鶴銘今存于焦山及寶墨亭者蓋盡於此凡文字

句語讀之可識及點畫之僅存者百三十餘言而所
亡失幾五十字計其完書畫蓋九行行之全者率二
十五字而首尾不與焉熙寧三年春予與汾陽郭逢
原公域范陽張禕子偉索其逸遺於焦山之陰偶得
十二字於亂石間表畱惟寧十字完餘二字譌缺石
甚迫隘偃卧其下然後可讀故世人未之見而世不
傳其後又有丹陽外仙江陰真宰八字與華陽真逸
上皇山樵為侶似是真侶之號今取其可考者次序

之如此其間闕文雖多如華亭寥廓之類亦可以意
讀也二月一日南陽張舉子厚記

刁景純得唐人書瘞鶴銘文

鶴壽不知其紀壬辰歲得於華亭甲午歲化於朱方
天其未遂吾翔寥廓也耶奚奪余仙鶴之遽也迺裹
以玄黃之幣藏之茲山之下故立石旌事篆銘不朽
詞曰

相此胎禽仙家之真山陰降蹟華表畱名真惟彷彿

事亦微冥西竹法里宰耳歲辰鳴語解化浮丘去莘
左取曹國右割荆門後蕩洪流前固重扃我欲無言
爾也何明爰集真侶瘞爾作銘宜直示之惟將進寧
丹陽仙尉江陰真宰立石

瘞鶴銘在潤州焦山下初刻于崖石久而崩摧覆壓
掩沒故不復得其全文余嘗怪唐人尚書學而此銘
字特竒偉宜世賞悉而卒不見傳於人自張懷瓘張
愛賓徐浩論書備有古今字法亦不見錄考其歲月

雖不可得然此山之摧裂圯堦莫知何時而是書壓
覆山下知其刻已久但隱沒石間自昔或未知之然
其刻畫亦幸至今尚存歐陽文忠公以舊記稱王羲
之書為非又疑顧況自號華陽真逸謂此書類顏太
師沈存中直謂顧況所書而碑書篆者上皇山樵也
則謂况書不可也往時邵興宗考次其文闕四十二
字而六字不完又有六字不知其次其後張墾自力
求之摹兩山間其闕字三十有五不完者七而又別

得十二字與興宗不同昔刁景純就金山經度中得
唐人於經後書瘞鶴文以校興宗子厚其字錯雜失
序多矣宜直示之惟將進寧則不可究今並列存之
來者可以考矣文忠集古錄謂得六百字今以石校
之為行凡十行為字廿五安得字至六百疑書之誤
也余於崖上又得唐人詩詩在貞觀中已刻銘後則
銘之刻非顧況時可知集古錄豈又并詩繫之耶

廣川

書
跋

黃伯思學士以痊鶴銘示余世謂晉右軍將軍王逸
少書歐陽公疑華陽居士唐顧况道號然逸少逋翁
其書可見不與此類嘗考次其年羲之生晉惠帝大
安二年癸亥歲至穆帝升平五年辛酉歲卒當五十
九年而成帝咸和九年太歲在甲午逸少當三十二
歲逮四十八年辛亥始去會稽其時未嘗至朱方華
陽又非其郡邑所望不得以此為稱顧况卒於貞元
末當元和七年為壬辰九年為甲午良不及也上推

壬辰歲為天寶十一載况當兒穉其號華陽乎盖自
貞元以後皆不合於此昔陶弘景嘗以其居華陽觀
故自號華陽隱居貞白平時著書不稱建元直以甲
子紀其歲今日壬辰歲得之山陰甲午歲墓于朱方
壬辰當天監十一年甲午則其十三年也隱居以天
監七年游海岳往會稽來永嘉至十年還茅山十二
年弟子周子良仙去貞白作傳即十一年在華陽此
其可知也或曰茅山碑前一行貞白自書與今銘甚

異則不得為陶隱居所書然華陽真逸特其撰銘若
其書者上皇山樵也四人各以其號自別固不得識

其姓名疑皆隱君子也然其書在江巖石壁摹搨最
難又石推壓其上人不得至風雨雪霜不及故字畫

至今尚完或疑梁以書傳達六百年不應如新刻於
石余求銘後王瓚書蓋自貞觀至今亦無譌缺貞觀

去梁未久可考而知也

廣川
書跋

宋曹士冕云焦山瘞鶴銘筆法之妙為書家冠冕前

輩慕其字而不知其人最後雲林子以華陽真逸為
陶弘景及以句曲所刻弘景朱陽館帖叅校然後衆
疑釋然其賞鑒可謂精矣以余考之一本山樵下有
書字真宰下有立石二字一本我傳爾銘作出於上
真爾其藏靈作紀爾歲辰張學本作丹陽外仙邵亢
本作丹陽仙尉又有作丹陽外仙尉者且中間辭句
亦多先後不同尚俟拏舟過揚子手自摹印以稽其
得失之一二可也

王氏法
書苑

右梁陶弘景正書瘞鶴銘刻京口焦山西南之麓下
臨江水予弘治甲子嘗游焦山問僧銘之所在則云

已崩裂墮江雖水落亦不復見予信之載其語游山
記中正德丁丑冬再至京口錢逸人德字為予言嘗

識其處予既驚喜且自笑昔為僧所誑遂與德字及
鄉貢士俞貞明渡江登山踏雪尋之果得於石壁之
上可讀者僅二十字因撮以歸未至銘數十步崖上
有宋嘉熙二年陸放翁題字云踏雪觀瘞鶴銘乃知

昔人好奇已先於余銘殘缺而錄其全文好奇之士

庶幾同一快也

金薤
琳瑯

瘞鶴銘見稱於世不在蘭亭之下但以其僻在荒寂
山僧憚於摹搨給云崩裂墮人間既少其本雖京
口士大夫往來山中亦以僧言為信吾師南濠先生
家藏碑刻甲於東南嘗錄其文悉加題品為金薤琳
瑯凡數十卷獨以未得此銘為恨邇者放舟京口冒
雪渡江果得於山石之下親搨以歸由是此銘復傳

人間而僧亦不能隱矣昔姜白石有蘭亭考俞壽老
有蘭亭續考元慶敢竊其義取古今論辨緝為一編
名之曰瘞鶴銘考天下後世豈無同予之好者乎正

德戊寅正月十日姑蘇顧元慶謹書

瘞鶴銘考

瘞鶴銘考

陳鵬年輯

瘞鶴巖一曰羲之巖

有瘞鶴銘中有逸少書三字故入又以為羲之巖

霹靂石

在瘞鶴巖側

瘞鶴銘在焦山下江水中

瘞鶴銘并序華陽真逸撰上皇山樵人逸少書鶴壽
不知其紀也壬辰歲得於華亭甲午歲化於朱方天
其未遂吾翔寥廓耶奚奪之遽也乃裹以懸黃之幣
藏乎茲山之下仙家有立石旌事篆銘不朽詞曰相
此胎禽浮丘著經迺徵前事出於上真余欲無言紀
爾歲辰雷門去鼓華表留聲我惟髣髴事亦微冥爾
其何之解化維寧後蕩洪流前固重局右割荆門未
下華亭爰集真侶瘞爾作銘江陰真宰丹陽外仙尉

峯山徵君

此宋咸淳間
所存者也

瘞鶴銘并序華陽真逸撰鶴壽不知其紀也壬辰歲
得于華亭甲午歲化於朱方天其未遂吾翔寥廓耶
奚奪之遽也乃裹以懸黃之幣藏乎茲山之下仙家
立石旌事篆銘不朽詞曰相彼胎禽浮丘著經迺徵
前事出於上真余欲無言紀爾歲辰雷門去鼓華表
留聲我惟髣髴事亦微冥爾其何之解化維寧後蕩
洪流前固重局右割荆門未下華亭爰集真侶瘞爾

作銘上皇樵人逸少書

此府治後
石刻臨本

趙氏金石錄云集古錄華陽真逸是顧况道號徧檢
唐史及况文集皆無此號惟况撰湖州刺史廳記自
稱華陽山人爾不知歐公何所據也苕溪漁隱曰集
古錄疑前後有人同斯號者西清詩話云余讀道藏
陶隱居外傳號華陽真人晚號華陽真逸此盖同斯
號矣集古錄又以字不類羲之筆法而類顏魯公不
知何人書也第蘇子瞻黃魯直皆以此銘為右軍書

得非本潤州圖經而言之故魯直云頃見京口斷崖
中瘞鶴銘大字右軍書以此觀之遺教經良非右軍
筆畫也若瘞鶴銘當為右軍書使人不疑如歐陽評
顏柳諸公書最為端勁然纔得瘞鶴銘髣髴爾唯顏
魯公宋開府碑瘦健清拔在石玉間又嘗有詩云小
字莫作癡凍蠅樂毅論勝遺教經大字無過瘞鶴銘
東觀餘論云晉成帝咸和九年甲午歲逸少方年三
十二不應已自稱真逸此銘決非右軍審矣又與劉

無言論書云焦山瘞鶴銘俗傳王逸少書非也一小
書中載云陶隱居書此或近之然此山有石刻王瓚
一詩字書全類此銘不知即瓚書抑瓚學銘中字而
書此詩也嘗親至彼觀之疑即瓚書也下有云上皇
山樵人逸少書非王逸少也蓋唐有此人亦號逸少
爾東觀餘論又有此二說

蔡佑雜記云焦山瘞鶴銘不著姓氏但稱華陽真逸
世因謂羲之書雖前輩名賢皆無異論獨章子厚丞

相不以為然緣石刻在崖下水中非窮冬水落不能
至其處其側復有司兵叅軍王瓚題名小字數十與
瘞鶴銘字畫一同雖無歲月可考官稱乃唐人則章
丞相可謂明鑒也又古洲馬子嚴題云余淳熙己酉
歲為丹陽郡文學暇日游焦山訪此石刻初於佛榻
前見斷石乃其篇首二十餘字有僧云往年於崖間
震而墜者余不信然遂挈舟再歷觀崖間尚餘茲山
之下二十餘字波間片石傾倒舟人云此斷碑水落

時亦可模搨余因請於州將龍圖閣直學士張子顏發卒挽出之則甲午歲以下二十餘字偶一卒曰此石下枕一小石亦覺隱指如是刻畫遂併出之其文與佛榻所見者同持以較之第闕二字而筆力頓異乃知前所見者為寺僧所給耳因摹數本以遺故舊近觀陶隱居諸刻反覆詳辨乃知此銘真陶所書前輩所稱者衆矣惟長睿之說得之

元鄭杓衍極第二卷論瘞鶴銘而劉有定釋云潤州

圖經以為王羲之書或曰華陽真逸顧况號也蔡君謨曰瘞鶴文非逸少字東漢末多善書唯隸最盛至於晉魏之分南北差異鍾王楷法為世所尚元魏間盡習隸法自隋平陳中國多以楷隸相叅瘞鶴又有楷隸筆當是隋代書曹士冕曰焦山瘞鶴銘筆法之妙為書家冠冕前輩摹其字而不知其人最後雲林子以華陽隱居為陶弘景及以句曲所刻隱居朱陽館帖叅較然後衆疑釋然其鑒賞可謂精矣

右俱丹徒

縣志志內載集古錄一則又載節錄東觀餘論廣川書跋二則全文俱已見前茲不重錄

延陵吳寧野京口三山贊序云北固之東則焦山焦山之勝則瘞鶴銘陶貞白踵焦處士而棲隱山靈為之改觀碑在層巒蔚然蒼古淋漓要非近代可儼嘗有贗本世共寬之

東海屠赤水云瘞鶴銘梁陶弘景書世傳在直隸鎮

江府焦山寺山峙水中今不可得其字神妙此董香光題考

樂餘事

山陰不見換鵝經京口空傳瘞鶴銘瀟灑謫仙來作
郡風流太守為開亭兩篇玉蕊塵初滌四體銀鈎跡
尚新我久臨池無所得願觀遺法快沉冥

右宋蘇文忠公題墨

妙亭詩

瘞鶴銘余往歲遊焦山後崖水落時得之僅數字耳
而此帖乃一百許字蓋取舊本刻之壯觀亭者刻手
精頗不失初意可翫也其書炳烺今古第不知為何
人造潤州圖經謂為王右軍至蘇子瞻黃魯直確以

非右軍不能也歐陽永叔疑是顧況尤無據黃長睿
謂為陶隱居又謂即丹陽尉王瓚瓚腕力弱不辦此
隱居雖近似要之亦懸斷也余不識書竊以為此銘
古拙竒峭雄偉飛逸固書家之雄而結體間涉踈慢
者手不隨者恐右軍不得爾至於鋒禿穎露非盡其
本質亦以石頑水泐之故而魯直極推之又酷愛之
得無作捧心隣女郎取魯直書作小推詰渠不能不
面赤也

焦山瘞鶴銘或以為陶隱居或以為顧况或謂即王
瓚筆獨蘇長公黃太史以為非右軍不能而苕溪漁
隱辨其誤似更有據余所藏舊搨銘書僅缺二十餘
字蓋郡守模之壯觀亭者雖結法加密而天真微利
葉伯寅常從其舅氏周六觀遊焦山於水中探刻石
摩挲久之不及搨時時悵恨昨年秋得袁尚之本僅
十六字加裝潢屬余題其後六觀博雅君子清言為
一時冠不幸早夭伯寅念之尤切母亦寄渭陽之思

於朱方之化耶題畢三歎

右王弇州焦山
瘞鶴銘跋二首

瘞鶴銘今在丹徒縣焦山下刻於崖石輟耕錄云須
潮落方可模故罕得其全文者歐陽文忠公以舊記
稱王羲之書為非又疑顧况號華陽真逸而此書類
顏太師沈存中則真以為况黃長睿東觀餘論謂陶
弘景嘗居華陽故自號華陽隱居弘景著書不稱建
元直以甲子紀歲今此銘曰壬辰曰甲午壬辰梁天
監十一年甲午十三年也弘景以天監七年遊海嶽

住會稽及永嘉至十年還茅山十二年弟子周子良
化去弘景為作傳即十一年在華陽可知也董道書
跋載南陽張學所記云瘞鶴銘今存於焦山凡文章
句讀之可識及點畫之僅存者百三十餘字而所亡
失者幾五十許計其完書蓋九行行之全者二十五
字而首尾不預焉熙寧三年春余索其遺逸於焦山
之陰偶得十二字於亂石間石甚迫隘偃卧其下然
後可讀故昔人未之見而世不傳其後又有丹陽外

仙江陰真宰八字與華陽真逸上皇山樵似是真侶
之號余於崖上又得唐人詩詩在貞觀中已列銘後
則銘非顧况可知矣今考此銘字體與舊館壇碑正
同其為隱居書無疑予友淮陰張弢以丁未十月探
幽山下復得七字云惟寧之上有厥土二字華亭之
上有爽塏勢掩四字其右題名微下有君字皆昔人
之所未見也

右顧寧人金
石文字記

已上俱陳鵬年滄洲瘞鶴銘考

瘞鶴銘辨

張昭著

瘞鶴銘刻於焦山西足當江流之衝怒濤走齧其下
想昔日轟裂之時正值雷雨之夕俗因傳為雷轟石
其石常沒於江惟冬日水落始得見予遙為慨念者
非一日矣丁未十月望後三日乃得過此先觀重刻
二石次至壯觀亭址右俯瞰破石叢雜攝衣下尋見
一石仰卧於前一石卧於後字在石下去泥沙咫尺
卧地仰觀始見字迹又一石側立剝甚各存字多寡

不一急命僕各搨一紙時落日風寒不能久立遂乘
片帆回所寓之銀山蘭若挑燈審視未得其詳及就
寢則又念此不置竟夜無眠次日復往搨之遂有如
晤故人之意第仆石之下仰搨為難僕之兩手又不
能兼理搨具予乃取其旁之紅紫落葉敷藉於地親
仰卧以助之墨水反落汚面不顧也及拏舟而返予
之周旋於石隙者已三日矣手足不寧上下如猿蠓
狀衣履皆穿始各得四紙所幸者湊其裂痕詳其文

字皆歷歷可觀所少者無幾爾此刻因手書于石其
字之大小疏密亦不一謹按原石存字上有並列六
行下有並列三行是當時本文之定位也惟其間殘
缺一段難於追尋及察重刻二種云是本之海昌陳
氏玉烟堂帖內者竊意摹本山之書而重刻之未有
不先求本山之舊蹟而反依轉摹之本以意為增損
者豈因水涸之時未能詳求或轉相委托以蹈承譌
襲舛之轍而不肯如予之身任勞苦歟此所以不得

不辨也初刻因淺學寡聞不能驟得證佐是以未詳
厥後徧搜諸書論列始覺瞭然茲亦不能具載但節
錄東觀餘論廣川書跋內切要之處知非王逸少書
并非陶顧所書凡予之欲言者古人已先言之殊勝
予之喋喋也

宋黃伯思東觀餘論載邵資政亢考次瘞鶴銘文見
前

宋董道廣川書跋二則已載刁景純得金山經度唐

人書瘞鶴銘文後

昭按二書論次出於宋熙寧之時其字之完闕皆有
次序當取為程式俱前列原文未免漏略今以昭所
搨先於側立石上得八字仰卧石上得三十字仆石
下原存二十三字并不全二字後察出惟寧上得厥
土二字華亭上得爽塏勢掩四字其右題名徵字上
得岳字徵字下得君字此八字儼然見存合前六十
九字何以數百年之諸君竟未之見耶據張子厚云

石甚迫隘偃卧其下然後可讀即昭當日同僕仰卧
搨出時閱之甚覺漶漫旋粘置壁間宛轉揣摩累日
累夜象其形勢繹其文理而後得此八字蓋不敢以
漫不經意而使古人遺跡等諸過眼烟雲也曩曾遍
質之宇內鑒賞諸君皆驚歎信然東吳顧亭林先生
所著金石文字載云淮陰張弢審訂復得八字可謂
毫髮無遺矣茲欲論其全勢苟不實有所據徒付空
談究何益乎今所據者惟於原石上下見存之定位

即可揆度其餘而予所尤難憇置者祇在其間亡失一段又據廣川跋云行之全者率二十五字即為句讀之約束定數每行除上下存者若干又據各本所傳之文填寫湊合恰當原位自無容那移其無證佐不敢擅入者僅闕十字

金山唐人書本存字如去莘西竹法里山陰之類儘可成句亦不輕為引用

較前後諸本又獨多矣然不比尋常碑版楚楚易讀

故非圖不明非註不悉特依原式完闕斷裂之形臚
列於左

圖內大書者為原存六十一字又不完二字

大書旁圈者為新得八字合六十九字

原存宋人補刻前序三十四字亦大書之

方格者字亡而文存因考諸本皆同故註於旁以便
句讀計六十三字又序我下不完一字

方格旁無註者係闕文十字

全七十二字

半十四字

江陰真宰

丹楊外仙尉

奉岳徵君

此石字在下面銘三行十九字又不完一字全形
侶宰上隔一石如枕斜連題名三行十二字又不
完一字止存右上半是奉左與下不可辨

此腹內一段久亡

作銘

高左取曹國右刺荆門

真侶塵爾

洪流前固重

唯髣髴事亦微

相此胎禽浮丘

爽塏勢掩華亭爰集

作版土惟寧後蕩

華表留形義

此仰面石六行存

欽定四庫全書

六藝之一錄

三十一

三山之下仙家
十
未遂吾翔

無隱
我
寒廓耶奚奪
仙鶴

鶴壽不知其紀也壬辰

歲得於華

亭甲午歲化於朱方天其

故立石旌事篆銘不朽詞曰
之遠也迺裹以玄黃之幣藏乎

華陽真逸
上皇
山樵書

塵 銘有序
鶴

此側立石止存八字亦不甚明

此宋人補刻
三行三十四
字即在仆石
之背上

標題止存一鶴字華陽真逸字可以想見

難搨聞數載前尚有紀也二字今亡

漢唐而下碑亦有逆書者後人以朱紫陽書太極篇
改作順行識者議之

今本山重刻橫直二種皆全依玉烟堂帖本前後改
竄不同與原石位次參差不合并字體多論亦列于
此以備對勘

瘞鶴銘

并序

華陽真逸撰

鶴壽不知其紀也壬辰歲得於華亭甲午歲化於朱方
天其未遂吾朔寥廓耶奚奪之遽也乃裹以玄黃之帶
藏乎茲山之下仙家有立石旌事篆銘不朽詞曰

相此胎禽浮丘著經迺徵前事出於上真余欲無言紀
紀爾歲辰玄門去鼓華袞留聲我惟髣髴事亦徵冥爾
將何之解化惟寧後蕩洪流前固重局右割荆門未下
華亭爰集真侶廕爾作銘上皇山樵人逸少書峯山徵
士丹揚外仙尉江陰真宰立石

前標題座字今刻謚作座下有序謚作并序

前題名一行原文華陽真逸譔上皇山樵書十字今
刻前止有華陽真逸撰五字逸又謚作逸譔又謚作
撰乃於銘末挿入上皇山樵人逸少書謚增人逸少
三字

序首行上於字今刻謚作於

序次行今刻奚奪下少余仙鶴三字奪又謚作奪藏
謚作藏

序三行原文仙家下是無字下闕三字是我字我下
又一字不完方接故立石字今刻仙家下論作有直
接立石字應少七字又旌譌作旌

銘首行原石上存相此等六字下存華表等五字其
間闕十四字當是浮丘著經下半句又余欲無言爾
也何明雷門去鼓三句下便恰合華表句矣今刻作
迺徵前事出於上真余欲無言紀爾歲辰多出二句
八字下占雷門二句之位與原石不合則次行唯髣

髯之位亦不合矣又雷譌作玄鼓譌作鼓表譌作表
畱譌作留形譌作聲義譌作我

銘次行上存唯髣髴等六字下存厥土等六字其間
闕十三字當是微冥一句又爾將何之一句解化下

半句下又闕一句即接厥土維寧矣今刻以解化接
惟寧為句竟參錯損去二句八字與原位相遠况原
位相遠况原石惟寧上見存厥土二字盖未察也又

蕩譌作蕩

銘三行上存洪流等五字下存爽塏等八字其間闕
十一字當是重扃一句又左取曹國右割荆門下又
闕二字是爽塏上半句今刻重扃下作右割荆門未
下華亭察原石華亭上見存勢掩二字何以改作未
下勢掩上又存爽塏二字何以改作荆門可見各句
皆譌矣

右題名一行原文峯字止存上半偏在右下是岳徵
君三字今刻譌作峯山徵士岳譌作山君譌作士

題名二行丹譌作丹

題名三行原文江陰真宰四字今刻下增立石二字
右皆指數可見者不敢略加妄議想因重摹之時不
曾計其位次牽合足成爾再察元陶宗儀南村輟耕
錄本亦有不同諸句云乃徵前事我傳爾銘余欲無
言爾其藏靈又作義唯彷彿歷下華亭奚集真侶董
文敏遂依之以刻石輟耕又云以余考之一本山樵
下有書字真宰下有立石二字一本我傳爾銘作出

於上真爾其藏靈作紀爾歲辰陳氏玉烟堂帖正本
之此今重刻二種又本之玉烟堂也末尾又云其間
詞句亦多先後不同尚俟挈舟過楊子手自模印以
稽其得失一二可也可見南村亦是懸揣之詞在元
時已無定準無怪近日之紛紛也又廣東黎堯石并
嚴氏有翻刻之殘本未睹其全然刻於他處或增減
無考如金山唐人書本已自不同惟刻於本山者後
人將信為真或原石漸至於淪亡或憚勞不精於搜

考則終不能睹本來面目其為害孰甚乎請具眼者
辨之

凡神物之在天地間也隱見固有其時而能力而寶
之者豈不以其人哉岐陽之石鼓岱嶧之篆刻當昔
時消沉磨滅未嘗不偃仆於烟榛霜艸之間一旦有
好事者寶之聚之雖或不無殘缺而人終不敢以譌
舛亂焉陸放翁云殘璋斷玦以真為貴豈在多耶顧
不然歟殆之於瘞鶴銘也既備列五本於前可以一

覽較然矣然釋文雖詳而本文未顯究不能與石鼓
篆刻彪炳天壤吁可惜也原其要歸仍以重立原石
為主請試言其次第蓋重立之法宜先以仰面一石
側立一石移置寶墨亭上至仆石雖大固曩所曾植
者若扶而立之江邊斯稱極快否則俟冬日水涸時
掘其沙土容身可搨再別磨一石依原位行次效宋
人之補刻重摹而精勒之亦一快也不然姑將仰面
一石取起可一朝而畢至為簡易從來遺墨數字即

可垂之久遠况此石見存三十字已得首尾之大概
乎誠令此石先得無恙徐圖再摹三十九字與不全
二字并宋人補序三十四字合一百三字置於一處
則神物復還舊觀一以正前人之謫舛一以啟後來
之信從力而寶之是所望於博雅君子首為倡率者
也予始於丁未迄於甲戌垂三十載其間遍游五嶽
較刻諸書故鹿鹿無暇每思各依原形大小摹刻四
幅於家園日月逾邁忽至七旬嗚呼予且老矣方苦

形神之衰憊老病之相侵無可如何因念茲一段殷
勤細訪亦大費苦心亟重刻此本并力疾雙鉤數紙
以待識者且玩而老焉可矣曩者談長益先生曾為
題識今吾友潘子雙南不時往還江淮即以相貽俾
藏於焦頂雙峰閣上令久存其真不得淹沒至於石
之果能復立耀光怪而吐虹霓他日有望氣者是必
遠知神物之所在也

右張弢力臣瘞鶴銘辨

瘞鶴銘攷

胡仔茗溪漁隱

第一條東觀餘論

見前

第二條載金石錄

見前丹徒縣志

第三條載西清詩話及東觀餘論二說

見前丹徒縣志

瘞鶴銘

陶九成輟耕錄

瘞鶴銘華陽真逸譔上皇山樵鶴壽不知其紀也壬辰歲得於華亭甲午歲化於朱方天其未遂吾翔寥廓耶奚奪之遽也迺裹以玄黃之幣藏茲山之下仙

家無隱我故立石旌事篆銘不朽詞曰相此胎禽浮
 丘著經乃徵前事我傳爾銘余欲無言爾其藏靈雷
 門去鼓華表留形義惟彷彿事亦徵冥爾將何之解
 化惟寧後蕩洪流前固重扃右割荆門厯下華亭奚
 集真侶瘞爾作銘丹陽外仙尉江陰真宰

銘後述東觀餘論廣川書跋二則

俱已見前

又劉有定

釋行極一則

見前丹徒縣志

又曹士冕曰以下至末

見前王氏

法書
 苑

右二書論跋雖已見前但丹徒縣志及王氏法書苑僅採其說而不著其書今因王弇州引苔谿漁隱張力臣引輟耕錄故述其略於此惟輟耕錄所載銘文又與前五本不同則備錄焉

厲鶚太鴻瘞鶴銘詩

我生好讀浮丘經
焦山來訪瘞鶴銘
纍纍之冢令威歎
羽化誰使傳千齡
迺知仙家重文字
不異人世諛

幽扃崩崖歆浪下
無路直待水縮霜
霰零墨痕濺面

葉藉背仰卧方可摹
真形張王近事僧指說

張弼王煥

竒

險欲動魚龍聽長沙陳公

鵬年

發天祕抉取覆以屋建

金史卷一百六十七
領繕亭何必厯三癸鑿石直疑煩五丁上皇樵書今
得覲尤慮氈推日敲擊比量北海遇趙岐特護翠珉
藏復壁敢辭米老河豚譏賈本重鏤外加罽篝燈側
走窺天幽彈渦親剔筆畫道真官若掌女青律筦牡
知職藹窮搜百番赫蹠走書估三日卧看母自苦摩
掌後此五百年鋒棱就視空茫然吁嗟神物非近翫
不如天吳什襲猶能全

六藝之一錄卷一百六十七